

Masyarakat Cina sokong pindaan — Kim Sai

BUTTERWORTH, Ahad — Seluruh masyarakat Cina di negara ini berdiri teguh di belakang kerajaan serta menyokong penuh pindaan perlembagaan yang diluluskan oleh Parlimen.

Ketua Pergerakan Pemuda MCA, Datuk Lee Kim Sai menyatakan demikian di majlis ulang tahun ketujuh MCA Taman Chai Leng di sini, semalam.

Datuk Lee berkata, "satu kajian yang dijalankan mendapati masyarakat Cina memberi sokongan kepada pindaan perlembagaan itu."

Datuk Lee menambah, kajian itu juga mendapati semua ketua bahagian MCA di seluruh negeri ini masing-masing memberi kepercayaan kepada kepimpinan Datuk Seri Dr Mahathir Mohamad.

Beliau berkata, "kita yakin isu itu dapat diselesaikan dengan kebijaksanaan pucuk pimpinan kita."

Inilah kenyataan berterus-terang dari pemimpin pemuda MCA mengenai isu itu.

Berita Harian difahamkan sokongan bulat seperti itu akan disuarakan juga oleh pemimpin-pemimpin MIC.

Difahamkan tokoh-tokoh dari parti Gerakan juga akan membuat kenyataan berhubung pendirian mereka menyokong pindaan perlembagaan.

Sebelum ini dua orang tokoh parti pembangkang masing-masing menyuarakan sokongan terhadap pindaan perlembagaan itu.

Antaranya termasuk Pengerusi Kebangsaan PSRM, Encik Kassim Ahmad.